

Povodom zahtjeva Jasenka Tufekčića



Tufekčić: Rok sedam dana



Kojović: Nemamo podataka

VLADA ČEKA

• Kolegij Doma naroda uskoro će se vanredno sastati • Vlada će napraviti informaciju o poplavama kad dobije zaključak

Potpredsjedavajući Doma naroda Parlamenta FBiH Jasenka Tufekčić (SDA) zatražio je jučer da se u roku od sedam dana održe vanredne sjednice Kolegija i Doma naroda, a sve zbog toga jer Vlada FBiH nije ispoštovala desetodnevni rok za dostavljanje informacije o pruženoj pomoći i saniranju šteta od poplava. Ovaj zaključak usvojio je Dom naroda na sjednici održanoj 31. jula.

Kolegij u ponedjeljak?

U pismu predsjedavajućem Domu naroda Tomislavu Martinoviću (HDZBiH) Tufekčić kaže da će ukoliko sjednice ne budu održane, podnijeti ostavku. Martinović je jučer za Oslobođenje potvrdio da je primio pismo, te da će sa kolegama dogovoriti sazivanje Kolegija, najvjerovatnije za ponedjeljak.

- Mi smo na početku prošle sjednice raspravljali o poplavama, ja ću kao predsjedavajući kazakati sjednicu Kolegija da vidimo šta konkretno Tufekčić želi i o čemu bismo raspravljali. Kad su poplave u pitanju, Dom naroda je završio sve kako bi se moglo postupati, rekao je Martinović.

Vlada je po zaključku Doma od 31. jula zadužena da dostavi pisani izvještaj delegatima o tome šta je dosad konkretno poduzeto kad su u pitanju pomoć i saniranje posljedica poplava. Martinović kaže da izvještaj iz Vlade još nije stigao.

- Taj zaključak nikad nije došao Vladi FBiH. Kada i ako dođe, bit će proveden, rečeno je jučer iz Vlade FBiH za Oslobođenje.

U Domu naroda Parlamenta FBiH su nam rekli da je pomenuti zaključak po usvajanju odmah objavljen na internet-stranici Doma naroda, da su mediji izvijestili o njegovom usvajanju, te da su sjednici na kojoj je zaključak usvojen prisustvovala i dva federalna ministra.

Delegat iz Kluba Srba Predrag Kojović (Naša stranka) smatra da se u konkretnom slučaju radi o potezu SDA koji je još jedan "primjer njihove političke strategije koja počiva na

presumpciji da glasači nemaju ni pamćenja ni pameti", ali isto tako naglašava da je uopšte izostao konkretan i precizan izvještaj o uzrocima i posljedicama poplava.

- Malo sam iznenađen da je gospodin Tufekčić, kojeg lično vrlo cijenim, pristao za svoju partiju igrati tu ulogu, pogotovo o jednom važnom i osjetljivom pitanju kao što je pomoć poplavljenim područjima. Tačno je da su poplave, možda očiglednije nego njihova nemogućnost da se uhvate ukoštac sa budžetskim deficitom i pokrenu ekonomiju, izbacile na vidjelo potpunu nefunkcionalnost ove Vlade, ali je apsurdno da medijsku galamu povodom toga diže istaknuti član partije čiji ministri sjede u toj istoj Vladi. Na kraju krajeva, radi se o partiji koja je zloupotrebom mehanizma za zaštitu vitalnog etničkog interesa spriječila rekonstrukciju Vlade FBiH koja je upravo i pokrenuta jer je postalo jasno da u ovakvom sastavu ne može biti funkcionalna, kaže Kojović za Oslobođenje.

Bez predodžbe o posljedicama

On dodaje da se odavno moralo biti u procesu obnove područja koja su poplavljena u maju.

- Ali, nažalost, mi ni do danas nismo dobili ni osnovni, najgrublji, izvještaj niti o uzrocima niti o posljedicama te tragične prirodne nesreće. O dubinskoj analizi finansijskih i ekonomskih pa i socijalnih posljedica poplava da i ne govorimo. Koliko je uništenih objekata bilo hipotekarno opterećeno, šta će to značiti za obavezne rezerve banaka i njihov kreditni potencijal i uticaj svega toga na njihovu sposobnost da podrže realni sektor? Mi nemamo ni predodžbu o dugoročnim posljedicama poplava u agrokulturi niti smo čuli bilo kakav plan države o intervencijama na tržištu namirnica ili koji bi spriječio da slične tragedije imaju ovako ozbiljne i dugoročne posljedice u budućnosti..., kaže Kojović. **M. D. R.**



KO ĆE KOME K

• Suljagić ima najbolju poziciju zato što može uzimati glasove s lijeve i desne strane. Nije riječ o ideološkoj orijentaciji, nego o grafikonu migracija koji pokazuje da on može uzimati glasove od Hadžiomerovića, ali i od Izetbegovića i Radončića • Sefer Halilović ima nezanemariv potencijal, analizira Valicon

Rezultati Valiconovog istraživanja, obavljenog anketiranjem građana sa područja Federacije BiH o tome za koga bi glasali na predstojećim općim izborima, pojavili su se u javnosti početkom avgusta, a iz ove kompanije ekskluzivno za

Oslobođenje daju svoju analizu. I napominju: rezultati nisu bitni, oni su zapravo polazna osnova iz koje i kandidati i partije mogu mnogo naučiti.

Zašto vodi DF?

Podaci, pak, govore da Demokratska fronta Željka Komšića (DF) ima značajnih 24 posto, što u Valiconu ne smatraju iznenađenjem, jer je u pitanju nova stranka, a birači su do sada pokazali da obično biraju "manje zlo", te da je zapravo adut novih

stranaka to što nemaju hipoteke iz prošlosti, mada to zvuči neobično jer su ljudi dugo u politici, pa i sam predsjednik.

- DF nije imao glasače 2010, što implicira da na ovim izborima neće biti donator glasova drugim partijama. Za razliku od ostalih kod kojih evidentiramo migracije, i to u oba pravca. Stoga nije iznenađujuće što je DF politička partija s ozbiljnim potencijalom, smatraju u Valiconu.

DF je, po ovom istraživanju, prvi, slijede SDA (17 posto) i SBB (12 posto).

- SDA i SBB su sigurno bliski konkurenti, oni se zapravo takmiče za isti segment biračkog tijela, objašnjavaju u Valiconu.

Posmatrajući potencijalne migracije drugog izbora glasača, može se vidjeti ko su potencijalni, glavni konkurenti. Na



Suljagić

Izetbegović

Cerić

VIJESTI

DEMOKRATSKA FRONTA

Na izborima kazniti dvojac s Poljina


Mi u Demokratskoj fronti - Željko Komšić želimo ovim putem da iskažemo zadovoljstvo što Zlatko Lagumdžija i Bakir Izetbegović ne poriču savez protiv promjena koji su sklopili, kaže se u jučerašnjem priopćenju ove stranke, te još jednom podvlači da Zlatko i Bakir, odnosno njihova klijentela upravlja dominantnim dijelom, ako ne i svim javnim resursima u Federaciji Bosne i Hercegovine. Ali i na državnom nivou. Upravo oni, tvrde u DF-ŽK-u, imaju moć da određuju koliko je tanak ili debeo asfalt na cestama, moć da odrede cijenu kilometra autoputa od 35 miliona maraka, da grade ceste bez izlaza, da cijena kubika betona koji se ugrađuje u cestovne nasipe i mostove može biti od jedne marke do 140 eura - moć da određuju ljudske sudbine.

Nećemo se, kažu u ovoj stranci, svetiti nikome, ali ćemo predano raditi na provedbi zakona i na tome da svaki zakon važi jednako za sve. Stoga će i Zlatko i Bakir morati da pred narodom ove zemlje objasne očiti nesrazmjer između deklariranih ličnih primanja i enormne imovine kojom raspolažu. Za početak će morati da obja-



sne kojim putem i kako je plaćeno ono što posjeduju na Poljinama za čiju odbranu su bili spremni založiti živote pripadnika sarajevske policije u trenutku dok je gorilo Predsjedništvo BiH, a njih dvojica ružila nezahvalni narod. Samo u paralelnoj stvarnosti u kojoj živi Zlatko Lagumdžija enormnu imovinu kojom raspolaže moguće je steći sa profesorskom, odnosno ministarskom platom. Ponavljamo da nije sramota imati poslovni stajad i dvosoban stan na Grbavici te živjeti od plaće profesora. Sramota je ne znati objasniti otkud toliki novac i nekretnine poslije ulaska u politiku, kažu u ovoj stranci i pozivaju građane BiH da masovnim izlaskom na izbore glasačkim listićem i olovkom kažu šta misle o Zlatkovoj i Bakirovoj sramoti.

RASTI GLASOVE NA IZBORIMA?



nivou Federacije DF ima jednu trećinu glasača, skoro 30 posto, a najzanimljivije je to što je politička opcija sa najvećim udjelom drugog izbora. Naime, 15 posto anketiranih bi glasalo za DF kao drugi izbor ako ne bi glasalo za onu partiju koja im je prvi izbor. SDP bilježi pad i po ovoj anketi je dobio sedam posto glasova prvog izbora. SDP-ov drugi izbor je osam posto, s čime može udvostučiti svoje trenutne glasače. Stranka za BiH (SBIH), Naša stranka i Narodna stranka Radom za boljitak (NSRB) se kreću oko tri do četiri posto na nivou Federacije.

- I to je zapravo i glavni zaključak, glavni cilj ovog istraživanja - vidjeti u početnoj fazi ko kome jeste stvarni konkurent. Ne po

ideološkom smislu, nego u svijesti ljudi, u svijesti glasača koji će i glasati. Iako se procenti u političkim istraživanjima često prikazuju i svi se rado referiraju na njih, što bi trebalo biti finalni cilj (oktobar 2014), u ovoj fazi Valicon naglašava da je puno važnije razumjeti svoje, pa i tuđe glasače, njihove motive glasanja i prelaza te na osnovu tih zaključaka kreirati pametne i ciljne kampanje.

Ipak, Oslobođenje podsjeća da je SDA, po ovom istraživanju, ubilježila 16 procenata, SBB ima 12 kao prvi izbor, ali ima nešto veći broj drugog izbora, osam posto. Pa tako ukupni potencijal i jedne i druge partije je negdje na 20, 21 procent. Podjednak procent imaju i

HDZBiH i SDPBiH, sedam posto, s tim da SDP ima veći postotak drugog izbora.

Predsjednički kandidati

Kod predsjedničkih kandidata DF-ov kandidat Emir Suljagić (25 posto) ima najveću naklonost glasača kada je riječ o prvom izboru, uz dodatnih 14 posto potencijala kao drugi izbor. Zanimljivo, približan procent drugog izbora ima Sefer Halilović (BPS). Bakir Izetbegović (SDA) i Fahrudin Radončić (SBB) imaju približno isti procent prvog izbora. Radončić ima 14 posto, a Izetbegović 16 procenata. Bakir Hadžiomerović (SDP) ima 13 posto prvog izbora i devet posto dodatnog potencijala.

NIJE IZNENAĐENJE Demokratska fronta Željka Komšića (DF) ima značajnih 24 posto, što u Valiconu ne smatraju iznenađenjem, jer je u pitanju nova stranka, a birači su do sada pokazali da obično biraju "manje zlo", te da je zapravo adut novih stranaka to što nemaju hipoteka iz prošlosti, mada to zvuči neobično jer su ljudi dugo u politici, pa i sam predsjednik

- Ali kad zbrojite Hadžiomerovića, nekih 22 posto, Suljagića koji ukupno i za prvi i za drugi izbor ima skoro 40 posto, vidite da zapravo nisu podjednake startne pozicije, ukazuju iz Valiconu.

Nezavisni kandidat Mustafa Cerić sad ima tri posto prvog izbora i šest posto drugog. Što, prema istraživanju, nije neka sjajna početna pozicija. Dragan Čović (HDZBiH) ima osam, dok Martin Raguž (HDZ 1990) ima šest posto, a Živko Budimir (SPP) tri posto prvog izbora. To ukazuje na moguću tijesnu borbu između Čovića i Raguža, s tim da treba pomenuti da Raguž ima dodatnih šest posto drugog izbora. Duplo više od Čovića koji ima tri posto.

Migracije glasova ukazuju da Halilović može pokupiti glasove Hadžiomeroviću i Radončiću, ali i Suljagiću. S tim da Suljagić, kada je riječ o trenutnom stanju, ipak može uzeti više glasača od Halilovića nego Halilović od njega.

- Suljagić ima najbolju početnu poziciju zato što je pozicioniran tako da može uzimati glasove s lijeve i desne strane. Grafikon migracija pokazuje da on može uzimati glasove od Hadžiomerovića, ali i od Izetbegovića i Radončića, kažu u Valiconu.

No, vrlo je zanimljivo da Izetbegović ima više potencijalno odlazećih i to prema Ceriću, Radončiću i Suljagiću. Međutim, glasači koji biraju druge kandidate ne razmatraju Izetbegovića kao drugi izbor.

Čović je, pak, među hrvatskim glasačima najbolji potencijalni donator, jer se među njegovim glasačima pojavljuju Budimir i Raguž kao drugi izbor. Martin Raguž trenutno ima dobar startni potencijal jer ima najveći udio drugog izbora među hrvatskim kandidatima.

M. ĐUROVIĆ RUKAVINA

VALENTIN INZKO

Vaše bonske ovlasti iskoristite 12. oktobra

Ove godine Bosna i Hercegovina je bila pogođena najtežim poplavama u zadnjih sto godina, što je uzrokovalo velike patnje ljudi u poplavljenim naseljima, napisao je u autorskoj kolumni za portal vijesti.ba visoki predstavnik u BiH Valentin Inzko. Također je podsjetio na to da smo nekoliko mjeseci ranije svjedočili velikim demonstracijama i građanskim nemirima kao odgovor na izrazito tešku socijalnu i ekonomsku situaciju u kojoj su se našli mnoge lokalne zajednice i građani. Građani su također ukazali na sve dublji jaz između male vladajuće elite i prosječnog građanina. Sve ovo se dešavalo u kontekstu propalih napora da BiH održi korak s ostatkom regiona na putu ka evroatlantskim integracijama, naveo je Inzko. Bez obzira, kaže, "na politička opredjeljenja ili mjesto boravka građana s kojima sam razgovarao, teško da sam sreo osobu koja ne dijeli moj stav da mora doći do temeljite promjene u načinu na koji će se voditi politika nakon izbora, odnosno da se mora odlučno početi rješavati veliki izazovi sa kojima



se BiH i njeni građani suočavaju, poput ogromne nezaposlenosti i korupcije".

- Ljudi me često pitaju da li ću koristiti bonske ovlasti za rješavanje nekog problema ili otklanjanje određenih prepreka u BiH. Ja im kažem, 12. oktobra vi imate priliku da koristite svoje ovlasti kao građani, vaše bonske ovlasti, a što je ujedno i vaše osnovno demokratsko pravo, napisao je Inzko.

Dodao je da je ključno pitanje kome će građani BiH dati povjerenje da omogući napredak koji zahtijevaju, te da o tome neće odlučivati ni on, niti međunarodna zajednica, niti neki političari iza zatvorenih vrata, već da će o tome odlučivati sami građani BiH.

NESREĆA U JAMI RASPOTOČJE

Četiri rudara lakše, jedan teže povrijeđen

Pet rudara, od kojih jedan teško, povrijeđeno je u nesreći koja se dogodila jučer uslijed gorskog udara u 12.20 sati u jami Raspotočje Rudnika mrkog uglja Zenica.

Nesreća se dogodila na dubini od oko 850 metara. Kako saznaje Oslobođenje, povrijeđeni su Edin S., Naim A., Nedžad Š., Ermin M. i Osman S. Prema riječima Aide Buro, portparola Kantonalne bolnice Zenica, kod četiri rudara se radi o lakim tjelesnim ozljedama i oni su nakon obrade na Odjelu urgentne medicine pušteni na kućno liječenje, dok je jedan rudar zadobio teške ozljede sa prelomom potkoljenice i on je hospitaliziran na Odjelu traumatologije zeničke bolnice.

Predsjednik Sindikata zeničkog Rudnika mrkog uglja Mehmed Oruč posjetio je odmah poslije nesreće povrijeđene rudare, zbrinute u Kantonalnoj bolnici Zenica, prateći situaciju i njihovo stanje. "Radi se o manjem gorskom udaru u kojem



je povrijeđeno pet komorata. Jednom je slomljena noga na dva mjesta, drugom povrijeđena ruka, dok su preostala trojica lakše povrijeđena", izjavio je Oruč, vjerujući kako će se svi brzo oporaviti i vratiti svojim radnim zadacima.

Gorski udar ili podzemni potres uslijed oslobađanja pritiska se desio na dubini od oko 850 metara gdje su, zapravo u tom užem krugu, radili povrijeđeni rudari. U ovim slučajevima se ne može uticati ni na kakav način. Dakle, niti se mogu predvidjeti niti spriječiti. U zeničkom rudniku primjenjuju se određene mjere zaštite koje mogu ublažiti te gorske udare. Ali, više od toga nisu u mogućnosti.

Mi. D.